

四庫全書

子部

欽定四庫全書

子部

太平廣記卷一百十九

四至

詳校官中書臣潘有為

侍讀臣孫球覆勘

總校官進士臣楊懋珩

校對官助教臣胡子襄

謄錄監生臣張魯詣

欽定四庫全書

太平廣記卷一百十四

報應十三

費崇光

魏世子

何曇遠

陳秀遠

葛濟之

董青建

齊竟陵王

張逸

釋僧護

僧澄空

釋慧侶

釋道積

釋法誠

費宗先

宋費宗先吳興人少信佛法精勤泰始三年受菩薩戒
寄齋於謝慧遠家二十四日晝夜不懈每聽經常以鵲
尾香爐置膝前初齋三夕見一人容服不凡逕來舉爐
去宗先視膝前爐猶在方悟神異自惟衣裳新濯了無
不淨惟坐側有唾壺既撤去壺即復見此人還爐於前
未至席猶見二爐既至即合為一然則此神人所提者
蓋爐影耳宗先又嘗聞人說福遠寺有欽尼者精勤得

道欣然願見未及得往屬意甚至常齋於他家中夜忽見一尼容儀端儼著赭布袈裟正立齋席之前食頃而滅崇先及見此尼狀貌被服即前夜所覩者也

出法苑珠林

魏世子

宋魏世子梁郡人奉佛精進兒女尊修惟婦迷執不信女年十四病死七日而蘇云可安施高座并無量壽經世子即為具設經座女雖持齋戒未常看經今即昇座誦聲清利下啟父言兒死便往無量國見父兄及己三

人池中已有芙蓉大花後當化生其中惟母獨無不勝
此苦故歸啟報語竟復絕母於是敬信法教

出冥
祥記

何曇遠

何曇遠廬江人父萬壽御史中丞曇遠奉法持菩薩戒
年十八丁父艱哀毀成疾殆將滅性號踊之外歸心淨
土庶祈感應時請僧數人曇遠向僧舍懺悔宿業終無
感徵僧舍每加獎勵不令懈怠爾後因夜轉經竟衆僧
已眠曇遠忽自歌誦僧舍驚而問之曇遠曰見佛身黃

金色光焰丈餘幡花翼從充滿虛空佛自西至呼令速去曇遠素羸弱少力此夕壯厲悅懌便於合中取香著手中并以園花散空母曰汝今若去不念吾耶曇遠無所言而頓卧信宿家中聞此靈異亦皆欣肅不甚悲懼曇遠至五更忽然而終宅中芬馨數日

出冥
祥記

陳秀遠

宋陳秀遠潁川人嘗為湘州西曹客居臨湘縣少信奉三寶年過耳順篤業不衰元徽二年七月中宴卧未寢

歎念萬品死生流轉無定惟已將從何來一心祈念冀
通感夢時夕結陰室無燈燭有頃見枕邊如螢火者明
照流飛俄而一室盡明連空如晝秀遠遽興合掌喘息
見庭中四五丈上有一橋閣危欄彩檻立於空中秀遠
了不覺升之坐於橋側見橋上士女往還衣裝不異世
人未有一嫗年可三十青襖白裳行至秀遠而立有頃
又一婦人純衣白布徧環髻持香花前語秀遠曰汝前
身即我也以此花供養佛故得轉身作汝復指青白嫗

曰此即復是我前身也言殫而去後指者亦漸隱秀遠
忽不覺還下之時光亦尋滅

出冥
祥記

葛濟之

葛濟之句容人稚川之後妻同郡紀氏體貌閑雅有婦
德濟之世事神仙紀亦慕而心樂佛法常存誠不替忽
一旦方織俄覺雲日開朗空中清明因投梭仰望四表
見西方有如來真形及寶蓋幢幡映天心獨喜曰經說
無量壽者即應此耶便頭面作禮乃引濟之亦登時見

半身及諸幡蓋俄而隱沒於是雲日鮮華五色燭耀鄉里備觀移時方歇焉

出冥祥記

董青建

齊董青建者不知何許人父字賢明建元初為越騎校尉初建母宋氏孕建時夢有人語云爾必生男體上當有青誌可名為青建及生如言即名焉有容止美言笑性理寬和家人未嘗覩其愠色見者咸異之至年十四而州辟主簿建元初皇儲鎮樊漢為水曹參軍二年七

月十六日寢疾自云不振濟至十八日臨盡起坐謂母曰罪盡福至緣累永絕願母自愛不須憂念因失聲大哭聲盡而絕將殯葬喪齋前其夜靈語云生死道乖勿安齋前自當有造像道人來迎喪者明日果有道人來名曇順即依靈語向曇順說之曇順曰貧道住在南林寺造丈八像垂成賢子乃有此感應寺西有少空地可得安葬也遂葬寺邊三日其母將親表十許人墓東見建如生云願母割哀還去建今還在寺住母即止哭而

還舉家菜食長齋至閏月十一日賢明夢見建云願父
暫出東齋賢明便香湯自浴齋戒出東齋至十四夜於
明中聞建喚聲驚起見建在齋前如生時父問汝住在
何處建云從亡來住在練神宮中滿百日當得生忉利
天建不忍見父母兄弟哭泣傷慟三七日禮諸佛菩薩
請四天王故得暫還願父母從今已後勿復啼哭祭祠
阿母已發願求見建不久當命終即共建同生一處父
壽可得七十三命終後當三年受罪報勤苦行道可得

免脫問曰汝從夜中來那得有光明建曰今與菩薩諸
天同下此其身光耳又問曰汝天上識誰建曰見王車
騎張吳興外祖宋西河建曰非但此一門中生從四十
七年以來至七死七生已得四道果先發七願願生人
間故歷生死從今永畢得離七苦建臨盡時見七處生
死所以大哭者與七家分別也問云汝皆生誰家建曰
生江吏川羊廣州張吳興王車騎蕭吳興梁給事董越騎
等家惟此間生十七年餘處止三五年耳自今已後毒

厲歲多宜勤修功德建見世人死多墮三塗生天者少
勤精進可得免度發願生天亦得相見行脫差異無相
值期又問云汝母憂憶汝垂死可令見汝否建曰不須
相見益懷煎苦耳但依向言說之諸天已去不容久住
慘有悲色忽然不見去後竹林左右猶有香氣家人亦
並聞餘香焉建云所生七家江檠羊希張永王玄宋謨
蕭惠明梁季文也賢明遂以出家名法藏

出法苑
珠林

齊竟陵王

齊竟陵王崇信內典得熱病夜中垂死夢見金像手灌

神湯因遂平復

出辯
正論

張逸

張逸為事至死預造金像朝夕祈命臨刑刀折而項不傷官問故答曰惟以禮像為業其像項有二刀痕如血

因得免死

出感
應傳

釋僧護

高齊時有釋僧護守道直心不求慧業願造丈八石像

咸怪其言後於寺北谷中見一卧石可長丈八乃顧匠
營造向經一周面腹粗了而背著地以六具拘舉之始
初不動經夜至旦忽然自翻即就營造移置佛堂晉州
陷日像汗流地周兵入齊燒諸佛寺此像獨不變色又
欲倒之大牛六十頭挽不動忽有異僧以瓦木土壑壘
而圍之尋失僧所在像後降夢信心者曰吾患指痛其
人寤而視焉乃木傷其二指也遂即補之開皇十年盜
像幡蓋者夢丈八人入室責之賊大怖悔而謝焉其像

見在

出法苑
珠林

僧澄空

隋開皇中僧澄空年甫二十誓願於晉陽汾西鑄鐵像
高七十尺焉鳩集金炭經求用度周二十年物力乃辦
於是造報遐邇大集賢愚然後選日而寫像焉及煙焰
滅息啟鑪之後其像無成澄空即深自咎責稽首懺悔
復堅前約再謀鑄造精勤艱苦又三十年事費復備則
又復寫像焉及啟鑄其像又復無成澄空於是呼天求

哀叩頭請罪大加貶挫深自勤勵又二十年功力復集
然後選日復寫像焉及期澄空乃身登鑪巔百尺懸絕
揚聲謂觀者曰吾少發誓願鑄寫大佛今虛費積年如
或踵前吾亦無面見大衆也吾今俟其啟鑪欲於金液
而捨命焉一以謝憊於諸佛一以表誠於衆善儻大像
圓滿後五十年吾當為建重閣耳時觀者萬衆號泣諫
止而澄空殊不聽覽俄而金液注射赫耀踴躍澄空於
是揮手辭謝投身如飛鳥而入焉及開鑪鐵像莊嚴端

妙毫髮皆備自是并州之人因起閣以覆之而佛身洪
大功用極廣自非殊力無由而致唐開元初李嵩為太
原軍節度使出游因仰像歎曰如此好相而為風日所
侵痛哉即施錢百萬緡周歲之內而重閣成就至今北
都謂之平等閣者是也計僧死像成日至嵩正五十年
矣以佛法推之則嵩也得非澄空之後身歟

出集
異記

釋慧侶

隋蔣州大歸善寺釋慧侶曲阿人也靈通幽顯世莫識

之而翹敬尊像事同真佛每見立像不敢輒坐勸人造
像惟作坐者後往嶺南修禪法大有悟解住栖霞時嘗
往揚都謁偲法師偲異禮接之將還山偲請現神力偲
即從窻中出臂解齊熙寺佛殿上額因語偲云世人無
遠識見多驚異故吾所不為耳大業元年終於大歸善
寺初偲終日以三衣還衆僧吾今死去徒衆好住便還
房內大衆驚起追之乃見房中白骨一具跏坐牀上就
而撼之鏘然不散

出法苑
珠林

釋道積

唐蒲州普濟寺釋道積河東安邑縣人也博通經教洞明玄旨河東英俊莫與同風先是沙門寶澄於普濟寺創營大像百丈功願未終而卒耆艾請積繼之積受衆勤請廣行緣化槐檀十遷而大像成就道俗慶賴感徹人天初積受請之夕夢二獅子於大像側連吐明珠相續不絕既寤歎曰獸王自在則表法流無滯寶珠自涌又喻檀施不窮宜運潛符徵效斯在即命工匠圖所夢

於彌勒大像前今猶存焉其寺在蒲坂之陽高爽華敞
東臨州里南望河山像設三層岩廊四合上方下院赫
奕相臨園磴田蔬周環俯就佛事隆盛咸積之功焉

出法

苑珠
林

釋法誠

終南山悟真寺釋法誠雍州萬年縣人事沙門僧和為
師和亦鄉族之所推奉嘗有人欲害和夜詣門見房內
猛火騰焰升帳遂即追悔誠奉佩訓勗常誦法華翹心

奉行朝夕無懈夢感普賢勸書大教既悟即入淨行道
重觀工匠令書八部般若香臺寶軸莊嚴成就又於寺
南橫嶺造華嚴堂鑿山堙塹列棟連甍前對重巖右臨
斜谷吐納雲霧下瞰煙虹寶竒觀也弘文館學士張孝
靜者善於書翰誠乃請孝靜寫藏經齋潔勤拳大致感
應靈禽異獸馴擾精廬貞觀十四年忽謂侍者曰諸行
無常法緣有竭九品往生斯言驗矣吾今去世汝無憂
惱言畢口光燭於楹奄然而化

出高僧傳

太平廣記卷一百十四

欽定四庫全書

太平廣記卷一百十五

報應十四

張法義

王弘之

崔義起妻

襄陽老姥

普賢社

李洽

王乙

鉗耳含光

席豫

裴休

牙將子

張法義

唐張法義華州鄭縣人年少貧野不修禮度貞觀十一年入華山伐樹見一僧坐巖穴中法義就與語晦冥不歸僧因設松栢末以供食之謂法義曰貧道久不欲外人知檀越出慎勿言相見因為說俗人多罪累死皆惡道志心懺悔可以滅之乃令淨浴被僧衣為懺悔旦而別去十九年法義病卒埋於野外貧無棺槨以薪木瘞之而蘇自推木出歸家家人驚愕法義自說初有兩人來取乘空行至官府入門又巡巷南行十許里左右皆

有官曹門閭相對不可勝數法義至一曹院見官人遙責使者曰是華州張法義也本限三日至何因乃淹七日使者云義家狗惡兼有祝師祝師見打甚苦袒衣而背青腫官曰稽限過多各與杖二十言訖杖亦畢血流洒地官曰將法義過錄事錄事署發文書令送付判官召主典取法義前案簿盈一牀主典對法義前披檢云其簿多先朱勾畢有未勾者則錄之曰貞觀十一年法義父使刈禾法義反顧張目私罵父不孝合杖八十始

錄一條即見昔巖穴中僧來判官起迎問何事僧曰張法義是貧道弟子其罪盡懺悔滅除訖天曹案中已勾畢今枉追來不合死主典云經懺悔者此案勾了至如張目罵父雖蒙懺悔事未勾了僧曰若不如此當取案勘之應有福利仰判官令典將法義過王宮殿宇宏壯侍衛數十人僧亦隨至王所王起迎僧王曰師當直來耶答曰未當次直有弟子張法義被錄來此人宿罪並貧道勾訖未合死主典又以張目視父事過王王曰張

目懺悔此不合免然師為來請可放七日法義白僧曰
日既不多後來恐不見師請即往隨師師曰七日七年
也可早去法義固請隨僧因請王筆書法義掌中作一
字又請王印印之曰可急去還家憑作福報後來不見
我宜以掌印呈王王自放汝也法義乃辭出僧令送出
至其家內至黑義不敢入使者去之遂活覺在土中甚
輕薄以手推排得出因入山就僧修福義掌中所印處
文不可識然皆為瘡終莫能愈至今尚存焉

出法苑
珠林

王弘之

唐王弘之貞觀中為沁州和川令有女適博陵崔軌於和川病卒經數十日其家忽於夜中聞崔語初時傾家驚恐其後乃以為常云軌是女壻雖不合於妻家立靈然而苦無所依但為置立也妻從其請朝夕置食不許置肉惟要素食恒勸禮佛又具說地獄中事云人一生恒不免殺生及不孝自餘之罪蓋亦小耳又云軌雖無罪然大資福助為軌數設齋供并寫法華金剛觀音等

經各三兩部自茲已後即不復來王家一依其言寫經
設供軌忽更來愧謝因云今即取別舉家哭而送之軌
有遺腹之子已年四五六歲軌云此子必有名官願善
養育自此不復來矣

出法苑珠林

崔義起妻

唐司元少常伯崔義起妻蕭氏父文鏗少不食葷茹酒
肉蕭氏以龍朔三年五月亡其家為修初七齋僧方食
其婢素玉忽云夫人來語某曰生時聞佛經說地獄今

身當之苦不可言賴男女等與我追福蒙放暫歸即向諸僧懺悔欲去又云我至二十日更來將素玉看受罪即如期素玉便昏絕三日乃蘇云初隨夫人到一大城中有一別院夫人所住亦兼有湯鑊鐵牀來至夫人尋被燒煮酷毒難說其夫人父文鏗忽乘雲在空呼曰早放素玉迴語素玉女曰我女生時不受戒故恣行貪嫉汝歸令崔郎多造功德為拔此厄又見一婆羅門僧從空中下作梵語教素玉念金剛法華藥師經各一遍令

去既活並不遺忘有梵僧聽之云素王所傳如同西國

語與中國異也

出報應記

襄陽姥姥

唐神龍年中襄陽將鑄佛像有一姥姥至貧營求助施卒不成得姥有一錢則為女時母所賜也寶之六十餘年及鑄像時姥持所有因發重願投之爐中及破爐出像姥所施錢著佛胸臆因磨錯去之一夕錢又如故僧徒驚異錢至今存焉乃知至誠發心必有誠應姥心至

誠故諸佛感之令後人生希有此事也

出紀聞

普賢社

開元初同州界有數百家為東西普賢邑社造普賢菩薩像而每日設齋東社邑家青衣以齋日生子於其齋次名之曰普賢年至十八任為愚豎廝役之事蓋所備嘗後因設齋之日此豎忽推普賢身像而坐其處邑老觀者咸用怒焉既加詬罵又苦鞭撻普賢笑曰吾以汝志心故生此中汝見真普賢不能加敬而求此土像何

益於是忽變其質為普賢菩薩身身黃金色乘六牙象
空中飛去放大光明天花綵雲五色相映於是遂滅邑
老方悟賢聖大用驚慚其西社為普賢邑齋者僧徒方
集忽有婦人懷妊垂產云見欲生子因入菩薩堂中人
呵怒之不可禁止因產一男子於座之前既初產生甚
為汙穢諸人不可提挈出深用詬辱忽失婦人所在男
變為普賢菩薩光明照燭相好端麗其所汙穢皆成香
花於是乘象騰空稍稍而滅諸父老自恨愚闇不識普

賢刺眇其目者十餘人由是言之菩薩變現豈凡人能

識

出紀
聞

李洽

山人李洽自都入京行至灞上逢吏持帖云追洽洽視
帖文字錯亂不可復識謂吏曰帖書乃以狼籍吏曰此
是閻羅王帖洽聞之悲泣請吏暫還與家人別吏與偕
行過市見諸肆中饋饌吏視之久洽問君欲食乎曰然
乃將錢一千隨其所欲即買正得一牀與吏食畢甚悅

謂洽曰今可速寫金光明經或當得免洽至家寫經別
家人畢吏去行數十里至城壁宇峻巖因問此為何城
吏云安祿山作亂所司恐賊越逸故作此城以遏之又
問城主為誰曰是鄒元昌洽素與城主有故請為通之
元昌召入相見悲喜須臾有兵馬數十萬至城而過元
昌留洽坐出門迎候久之乃回洽問此兵云何曰閻羅
王往西京大安國寺也既至寺登百尺高座王將簿閱
云此人新造金光明經遂得延算故未合死元昌歎羨

良久令人送回因此得活

出廣異記

王乙

王乙者自少恒持如意輪咒開元初徒侶三人將適北河有船夫求載乙等不甚論錢直云正爾自行故不計價乙初不欲去謂其徒曰彼賤其價是誘我也得非包藏禍心乎船人云所得資者只以供酒肉之資但因長者得不滯行李爾其徒信之乃渡仍市酒共飲頻舉酒屬乙乙屢聞空中言勿飲心愈驚駭因是有所疑酒雖

入口者亦潛吐出由是獨得不醉洎夜秉燭其徒悉已
大斲乙慮有非道默坐念咒忽見船人持一大斧刃長
五六寸從水倉中入斷二奴頭又斬二伴次當至乙乙
伏地受死其燭忽爾遂滅乙被斫三斧背後有門久已
釘塞忽有二人從門扶乙投水岸下水深又投於岸血
雖被體而不甚痛行十餘里至一草舍揚聲云被賊劫
舍中人收乙入房以為拒閉及報縣吏人引乙至劫所
見岸高數十丈方知神咒之力後五六日汴州獲賊

問所以云燭光忽暗便失王乙不知所之一瘡雖破而不損骨尋而平愈如故此持如意輪咒之功也

出廣異記

鉗耳含光

竺山縣丞鉗耳含光者其妻陸氏死經半歲含光秩滿從家居竺山寺有大墩暇日登望忽於墩側見陸氏相見悲喜問其死事便爾北望見一大城云所居在此邀含光同去入城城中屋宇壯麗與人間不殊傍有一院院內西行有房數十間陸氏處第三房夫婦之情不異

平素衣玩服具亦爾久之日暮謂含光曰地府嚴切君
宜且還後日可領兒子等來欲有所囑明日不煩來也
及翌日含光又往陸氏見之驚愕曰戒卿勿來何得復
至頃之有緋衣吏侍從數十人來入院陸氏令含光入
牀下垂氈至地以障之戒使勿視恐主客有犯俄聞外
呼陸四娘陸氏走出含光初甚怖懼後稍竊視院中都
有二十八婦人緋衣各令解髻兩兩結投釜中冤楚之
聲聞乎數里火滅乃去陸氏徑走入房含光見入接手

牀上良久悶絕既寤含光問平生齋菜誦經念佛何以更受此苦答云昔欲終時有僧見詣令寫金光明經當時許之病亟草草遂忘遺囑坐是受妄語報罹此酷罰所欲見兒子者正為造金光明經今君已見無煩兒子也含光還家乃具向諸子說其事悲泣終夕及明往視已不復見但荒草耳遂貨家產得五百千刺史已下各有資助滿二千貫文乃令長子載往五臺寫經至山中遍歷諸臺未有定居尋而又上臺山路之半遇一老僧

謂之曰寫經救母何爾遲迴留錢於臺宜速還寫金剛
經也言訖不見其子知是文殊菩薩留錢而還乃至舍
寫經畢上墩又見地獄因爾直入遇閉門乃扣之門內
問是誰鉗耳贊府即云是我久之有婦人出曰貴閣令
相謝寫經之力已得託生人間千萬珍重舍光乃問夫
人何故居此答云罪狀頗同故復在此爾

出廣
異記

席豫

唐開元初席豫以監察御史按覆河西去河西兩驛下

食求羊肝不得捷主驛吏外白肝至見肝在盤中搖動
不息豫顰蹙良久令持去乃取一絹為羊鑄佛半日許
豫暴卒隨吏見王王曰殺生有道何故生取其肝獨能
忍乎豫云初雖求肝肝至見動實不敢食言訖見一小
佛從雲飛下王起頂禮佛言如豫所陳王謂羊曰他不
食汝肝今欲如何尋放豫還也

出廣
異記

裴休

唐開成元年宰相裴休留心釋氏精於禪律師圭峰密

禪師得達摩頓問密師注法界觀禪詮皆相國撰文序
常被毳衲於歌妓院中持鉢乞食自言曰不為俗情所
染可以說法為人每自發願願世世為國王弘護佛法
後于闐國王生一子手文中有裴休二字聞於中朝其
子弟請迎之彼國不允而止

出北夢
瑣言

牙將子

唐東蜀大聖院有木像製度環異耆老相傳云頃自荆
湘沂流而上歷歸峽等郡郡人具舟楫取之千夫牽挽

不至岸至渝州人焚香祈請應聲而往郡守及百姓遂
構大聖院安置之東川有牙將者其子常瘖忽一日晝
地告其父曰某宿障深重被茲業病聞大聖院神通欲
舍身出家依止供養冀消除罪根耳父許之由是虔潔
焚修夙夜無怠經數載倏爾能言抗音清辯超於羣輩
復有跛童子者覩茲奇異發願於大聖院終身苦行懺
悔求福未逾朞歲忽能起行筋骨自伸步驟無礙事悉
具本院碑殿有東廡見有瘖僧跛童子二畫像並存焉

出報
應錄

卷之三

三

太平廣記卷一百十五

欽定四庫全書

太平廣記卷一百十六

報應十五

謝晦

尼智通

王襲之

周宗

沈僧復

僧道志

唐文伯

崔平業

王鎮惡

郭祖深

衛元宗

姜勝生

傅奕

并州人

薛孤訓

嵩州縣令

丁零

唐武宗

王義逸

贅肉

西明寺

明相寺

僧義孚

開照寺盜

僧紹明

潼江軍

謝晦

宋尚書謝晦為荊州刺史謂塔寺不宜在人間當移之
郭外乃自率部下至新寺門遣隊士八十持刀斧毀壞
浮圖尊像縱橫瓦木傾墜俄而雲霧暗天風塵勃起晦

冥即怖走隊人驚散莫知所以晦等夜夢咸見沙門飛騰空中光明顯赫又見二人形悉丈餘容姿甚偉厲聲嗔曰所行反道尋當自知其後隊人滿身著癩疾經時而死餘人竝犯法就終謝晦連年患瘡病後因謀叛合家被誅皆非命而卒

出辨
正論

尼智通

宋尼智通京師簡靜尼也年貌殊少信道不篤元嘉九年師死罷道嫁為魏郡梁甫妾生一男年七歲家甚貧

窮無以為衣智通為尼時有數卷素無量壽法華等經
悉練擣之以衣其兒居一年而得病恍惚驚悸肌體壞
爛狀若火瘡有細白蟲日去升餘慘痛煩毒晝夜號叫
常聞空中語云壞經為衣得此報也旬餘而死

出冥
祥記

王襲之

宋吳興太守瑯琊王襲之有學問愛老莊而不信佛惟
事宰殺初為晉西省郎中性好賓客於內省前養一雙
鵝甚愛翫之夜忽夢鵝口銜一卷經可十紙許取看皆

說罪福之事明且果見乃是佛經因是不敢宰殺篤信

過人

出辨
正論

周宗

周宗者廣陵郡人也宋元嘉七年隨到彥之北伐王師失利與同邑六人逃竄間行於彭城北遇一空寺無有僧徒中有形像以水晶為相因共竊取之乃出村貸食其一人羸病等輩皆輕之獨不得分與既而各還家三四年中宗等五人相繼病癩而死不得分者獨獲免

出冥

祥記

沈僧復

宋吳興沈僧復大明末本土飢荒逐食至山陽晝入村
野乞食夜還寄寓寺舍左右時山陽諸小形銅像甚衆
僧復與其鄉里數人積漸竊取遂囊篋數四悉滿復因
將還家共鑄為錢事既發覺執送出都入船便云見人
以火燒之晝夜叫呼自稱楚毒不可忍未及刑坐而死
舉體皆拆裂狀如火燒吳郡朱亨親識僧復具見其事

出冥
祥記

僧道志

宋沙門僧道志者北多寶僧也嘗為衆僧令知殿塔自
竊幡蓋等寶飾所取甚衆後遂偷像眉間珠相既而開
穿垣壁若外盜者故僧衆不能覺也積旬餘而得病便
見異人以戈矛刺之時來時去輒驚叫應聲流血初猶
目中一兩如此其後病甚刺者稍數瘡痍遍體呻呼
不能聲同寺僧衆頗疑其有罪欲為懺謝始問猶諱而

不言將盡二三日乃具自陳列泣涕請救曰吾愚悖不通謂無幽途失意作罪招此殃酷生受楚拷死嬰刀鑊已糜之身惟垂哀恕今無復餘物惟衣被氈履或足充一會并頻請願具為懺悔者偷像相珠有二枚一枚已屬嫗人不可復得一以質錢在陳昭家令贖取道志既死諸僧合集贖得相珠并設齋懺初工人復相珠時展轉迴趣終不安合衆僧復為禮拜燒香乃得著焉年餘而同學等於昏夜間聞空中有語詳聽即道志聲也自

說云自死已來備嬰痛毒方累年劫未有出期賴蒙眾僧哀憐救護贖像相珠故苦酷之中時有間息感恩無已故暫來稱謝言此而已聞其語時腥腐臭氣苦痛難過言終久之乃稍歇

出冥
祥記

唐文伯

宋唐文伯東海贛榆人也弟好蒲博家資都盡村中有寺經過人或以錢上佛弟屢竊取後病癰卜者云祟由盜佛錢父怒曰佛是何神乃令我兒致此吾當試更虜

奪若復能病可也前縣令何欣之婦上織成寶蓋帶四枚乃盜取為腰帶不百日復得惡病發瘡之始起腰帶

處

出冥
祥記

崔平業

梁人崔平業者善弓馬為武士監軍一生以偷佛鎔銅為業賣銅以供酒肉心無慚懼年五十妻子兄弟並死業一身忽病目障飢寒並至餓死

出辨
正論

王鎮惡

梁人進士王鎮惡有學問而無善心出言多所非毀亦為時人所嫌輕慢佛法見僧必侮誚後以教學為業時有鹿溪寺僧法滿寄銅鐘一口於其學內未取之間鎮惡盜以鑄錢後與僧法滿對誓經年重病而舌彎縮口不得言既知負誓乃舍資鑄鐘贖罪至死口不得言

出王

戒氏

郭祖深

梁人郭祖深上梁武一十八條事請廢郭內小寺及無

業僧尼梁武不納後夢見神唾之遂病癩雖悔不差

出辨

正論

衛元宗

衛元宗毀法之後身著熱風委頓而死

出辨
正論

姜勝生

冀州故觀城人姜勝生唐武德末年忽遇惡疾遂入蒙
山醫療積年不損後始還家身體瘡爛手足指落夜眠
忽夢見一白石像可長三尺許謂之曰但為我續手令

爾即差至旦忽憶於武德初年在忝地裏打雀於故村
佛室中取維摩經裂破用繫杖頭嚇雀有人見者云盜
裂經大罪勝生反更惡罵遂入堂中打白石像右手落
夢中所見宛然舊像遂往佛前頭面作禮盡心悔過顧
匠續其像手造經四十卷營一精舍一年之內病得痊
鄉人號為聖像

出冥
報記

傅奕

唐太史令傅奕本太原人隋末徙至扶風少好博學善

天文歷數聰辯能劇談自武德貞觀中嘗為太史令性不信佛法每輕僧尼至以石像為墼瓦之用貞觀十四年秋暴病卒初奕與同伴傳仁均薛頤並為太史令頤先負仁均錢五千未償而仁均死後頤夢見仁均言語如平常頤因問曰先所負錢當付誰人仁均曰可以付泥犂人問是誰答曰太史令傳奕是也既而寤是日夜少府監馮長命又夢已在一處多見先亡人長命問經文說罪福之報未知審定有否答曰皆悉有之又問如

傳奕者生平不信死受何報答曰罪福定有然傳奕已

配越州為泥犁矣

出地獄
苦記

并州人

并州有人解畫曾陷北虜突厥可汗遣畫佛像此人時偷彩色恐被搜獲紙裏塞鼻中鼻中血出數升此人後為僧唐貞觀中於山東住寺漸漸患鼻二三年後鼻中生肉甚大如桃膿血狼藉酸疼不已後請僧靈顓懺悔病亦不愈十年始亡靈顓嘗住慈恩寺說其事

出廣古
今五行

記

薛孤訓

唐貞觀二十年征龜茲有薛孤訓者為行軍倉曹軍及屠龜茲後乃於精舍剝佛面金旬日之間眉毛盡落還至伊州乃於佛前悔過以所得金皆為造功德未幾眉

毛復生

出冥
祥記

嵩州縣令

唐貞觀中有人任嵩州一縣令往高昌於寺得一真珠

像至京師諸大寺欲與千貫錢買之不肯遂毀破賣得
一千三百貫後月餘患腫寤寐之間見一僧云何因毀
壞尊像遂遣人拔其舌長尺餘苦痛呻吟數日而死德
安縣令薛遠備知此事

出冥
祥記

丁零

相州鄴城中有丈六銅立像一軀賊丁零者志性兇悖
無有信心乃彎弓射像箭中像面血下交流雖加瑩飾
血痕猶在又選五百力士令挽仆地消鑄為銅擬亮器

用乃口發大聲響烈雷震力士亡魂喪膽人皆仆地迷悶宛轉怖不能起由是賊侶慙惶歸信者衆丁零後時著疾被誅乃死

出宣驗記

唐武宗

長安城北有古塚高十數丈傳云周穆王陵也唐會昌六年正月十五日有人夜行至陵下聞人語於林間意其盜也因匿於草莽中伺焉俄有人自空而來朱衣執版宣曰塚尉何在二吏出曰在位因曰錄西海君使者

何時當至吏曰計程十八日方來朱衣曰何稽對曰李

某

武宗名

坐毀聖教減一紀算當與西海君同日錄其魂

忽有賈客鈴聲自東來朱衣與二吏俱不復見後數月

帝果晏駕帝英毅有斷勤於庶政至如迎貴主以破羌

族復內地而殲狡穴武功震耀肅憲之次也然金人之

教不可厚誣則秦時焚書坑儒後華山中有告祖龍之

死者事不謬矣

出稽神錄

王義逸

唐會昌中有王義逸者護鳳翔軍值武宗斥毀佛刹義
逸以家財易諸瓦木取其精者遂大營市邸并治其第
為岐下之甲焉居三年一日有小吏入告有不便事且
泣曰某適方就室假寐有紫衣人招入一朱戶則類將
軍之第也見絲竹綺羅賓客列坐滿堂獨無將軍紫衣
人指階下一徑曰此路可見公主人因北趨見荆棘滿
地其路纔可容人步至低屋排戶而入見將軍卧於牀
上繫其手足有人持火至方藝其髮因出涕言曰吾不

幸生好賈販僧寺材礎以貪其利今繫於此後三日當死君歸為我告其家速毀邸第以歸佛寺不可輒留既而焰熾不能盡言義逸怒而叱之明日果腦發癰三日

而卒

出傳記
附錄

贅肉

釋氏因果時有報應近歲有一男子既貧且賤於上吻忽生一片贅肉如展兩手許大下覆其口形狀醜異殆不可言其人每飢渴則揭贅肉以就飲啜頗甚苦楚或

問其所因則曰少年無賴曾在軍伍常於佛寺安下同火共刲一羊分得少肉旁有一佛像上吻間可置之不數日嬰疾遂生此贅肉焉

出玉堂閒話

西明寺

長安城西明寺鐘寇亂之後緇徒流離聞其寺者數年有貧民利其銅袖鎚鑿往竊鑿之日獲一二斤鬻於闐闐如是經年人皆知之官吏不禁後其家忽失所在市銅者亦訝其不來後官欲徙其鐘於別寺見寺鐘平墮

在閣上及仆之見盜鐘者抱鎚鑿儼然坐於其間即已

乾枯矣

出玉堂
閒話

明相寺

鳳州城南有明相寺佛數尊皆飾以金焉亂罹之後有
貧民刮金鬻而自給迨至時寧金彩已盡於是遍身生
癬癢不可忍常須以物自刮皮盡至肉肉盡至骨而死

焉毀佛之咎昭報如此

出冥
祥記

僧義孚

僧義孚青社人解琴寓於江陵龍興寺行止詭譎府主
優容之俾齋錢帛詣西川寫藏經或有人偷竊社戶所
造藏經出貨義孚以廉價贖之其羨財遂為所有一旦
發覺賣經者斃於枯木下此僧雖免罪未久得疾兩唇
反引有似驢口其熱痛不可忍也人皆畏見苦楚備極
而死同寺有數輩販鬻經像懼而捨財修功德以孚為

鑒戒

出冥
報錄

開照寺盜

偽蜀金堂縣三學山開照寺夜羣寇入寺劫掠縋徒罄
盡寺元有釋迦藕絲袈裟為千載之異物也賊曹分取
與其妻折而易之夫妻當時手指節節墮落鬚髮俱墜
尋事敗戮於市

出微
戒錄

僧紹明

偽蜀大慈寺賜紫慈昭大師紹明主持文殊閣常教化
錢物稱供養菩薩聖像積有星歲所獲大半入己後染
病恒見火燒頂至足周而復始不勝其苦悔過懺謝唱

施衣竟不獲免

出倣
戒錄

潼江軍

偽蜀潼江起軍攻取閬州兵火燒劫閭里蕩盡佛寺有
一大鐘在地有一卒運大石擊鐘令碎而鬻之鐘破裂
流迸正中卒脛雙折而死

出倣
戒錄

太平廣記卷一百十六

欽定四庫全書

太平廣記卷一百十七

報應十六

孫叔敖

崔敬嗣

裴度

劉軻

劉弘敬

蕭倣

孫泰

李質

范明府

程彥賓

孫叔敖

楚孫叔敖為兒出遊還憂而不食母問其故泣曰見兩頭蛇恐死母曰今蛇安在曰敖聞見兩頭蛇者死恐後人又見殺而埋之矣母曰無憂矣聞有陰德天報之福

出賈

子

崔敬嗣

唐崔敬嗣為房州刺史中宗安置在房州官吏多無禮敬嗣獨申禮敬供給豐贍中宗常德之及登位有益州長史崔敬嗣既同名姓每進擬官皆御筆超拜之者數

四後引與語知誤訪敬嗣已卒遣安石授其子注官後
官至顯達其孫即光遠也

出談
賓錄

裴度

唐中書令晉國公裴度質狀眇小相不入貴屢屈名場
頗亦自惑會有相工在洛中大為縉紳所神公特造之
問命相工曰郎君形神稍異於人不入相若不至貴即
當餓死今則殊未見貴處可別日垂訪為君細看公然
之他日出遊香山寺徘徊于廊廡間忽見一素衣婦人

致緹褶於僧伽欄楯之上祈祝良久瞻拜而去少頃度方見緹褶在舊處知其遺忘也又料追付不及遂收取以待婦人再至日暮竟不至度挈歸逆旅詰旦復攜往寺門始闢覩昨日婦人疾趨而至慙聲惋歎若有非橫度從而問之婦人曰阿父無罪被繫昨貴人假得玉帶二犀帶一直千餘緡以賂津要不幸失去於此今老父不測之禍無所逃矣度憮然復細詰其物色因而授之婦人拜泣請留其一度笑而遣之尋詣昔相者相者審

度聲色頓異驚歎曰此必有陰德及物前途萬里非某所知也度因以前事告之度果位極人臣

出撫言

劉軻

唐侍御劉軻者韶右人也幼之羅浮九疑讀黃老書欲學輕舉之道又於曹溪探釋氏關戒遂被僧服故釋名海納北之筠川方山等寺又居廬嶽東林寺習南山鈔及百法論咸得宗旨焉獨處一室數夢一人衣短褐曰我書生也頃因遊學逝於此室以主寺僧不聞郡邑乃

瘞於牖下而屍骸跼促死者從直何以安也君能遷葬
必有酬謝乃訪于緇屬果然劉解所著之衣覆其骸骨
具棺改窆於虎溪之上是夜夢書生來謝將三雞子勸
軻立食之軻嚼一而吞其二焉後乃精於儒學而善屬
文章因策名第歷任史館欲書夢中之事不可自為傳
記吏部侍郎韓愈素知焉曰待余餘暇當為一文贊焉
愈左遷其文不就也

出雲溪
友議

劉弘敬

唐彭城劉弘敬字元溥世居淮淝間資財數百萬常修德不耀人莫知之家雖富利人之財不及怨施人之惠不望報長慶初有善相人於壽春道逢元溥曰噫君子且止吾有告也元溥乃延入館而訊焉曰君財甚豐矣然更二三年大期將至如何元溥涕泗曰夫壽夭者天也先生其奈我何相人曰夫相不及德德不及度量君雖不壽而德且厚至於度量尤寬且告後事但二三年之期勤修令德冀或延之夫一德可以消百災猶享爵

祿而況於壽乎勉而圖之吾三載當復此來言訖而去
元溥流涕送之乃為身後之計有女將適抵維揚求女
奴資行用錢八十萬得四人焉內一人名蘭蓀者有殊
色而風骨姿態殊不類賤流元溥詰其情久而乃對曰
賤妾死罪無復敢言主君既深訝之何敢潛隱某代為
名家家本河洛先父以卑官淮西不幸遭吳寇跋扈因
緣姓與寇同疑為近屬身委鋒刃家仍沒官以此湮沉
無處告訴其諸骨肉寇平之後悉被官軍收掠為俘不

可復知矣賤妾一身再易其主今及此焉元溥太息久之乃言曰夫履雖新不加於首冠雖舊不踐於地雖家族喪亡且衣冠之女而又抱冤如此三尺童子猶能發憤况丈夫耶今我若不振雪爾冤是為神明之誅焉因問其親戚知其外氏劉也遂焚其券收為甥以家財五十萬先其女而嫁之長慶二年春三月辛卯蘭蓀既歸元溥夢見一人被青衣秉簡望塵而拜迫之潜然曰余則蘭蓀之父也感君之恩何以報之某聞陰德所以動

天地也。今君壽限將盡，余當為君請于上帝，故奉告言。訖乃去。後三日，元溥復夢蘭蓀之父立於庭，紫衣象簡，侍衛甚嚴。前謝元溥曰：「余不佞，幸得請君於帝。」帝許我延君壽二十五載而富，及三代子孫無復後禍。其所殘害吾家者悉獲，案理之存者禍身沒者子孫受釁。帝又憫余之冤，署以重職，獲主山川於淮海之間。因嗚咽再拜而去。詰旦元溥依依未所甚信。後三年果相者復至，迎而賀元溥曰：「君壽延矣。且君自眉至髮而視之，元溥。」

側冠露額曰噫有陰德上動於天者自今後二十五載
慶及三代元溥始以蘭蓀之父為告相者曰昔韓子陰
存趙氏太史公以韓氏十世而位至王侯者有陰德故
也况蘭蓀之家無後矣蘭蓀之身賤隸矣如是而能不
顧多財之與殊色而恤其孤豈不謂陰德之厚哉

出陰德傳

蕭倣

唐丞相蘭陵公蕭倣清譽儉德時所推伏嘗統戎于番
禺有酌泉投香之譽以是夷估輻湊至於長安寶貨樂

肆咸豐衍於南方之物由此人情歸美僖宗誕聖于壬午龍飛於癸巳皇算十有二載矣思命耆德佐佑大化乃自奉常卿起為上相時年八十有三居台席數載汲引才俊導暢皇慈儉德既彰澆風少革及薨于位上甚追悼而廢常朝者三日冊贈之禮有加等焉議者曰高位重祿苟有其分陰靈必助其壽考不然安有過懸車之歲而命相之主始生也太公晚年七十而遇文王今逾釣渭之年一紀則知榮辱之分豈偶然哉

出唐
關史

孫泰

唐孫泰山陽人少師皇甫穎守操頗有古賢之風泰妻
即姨女也先是姨老以二女為託曰其長者損一目汝
可娶其女弟姨卒泰娶其姊或詰之泰曰其人有廢疾
非泰何適衆皆伏泰之義嘗于都市遇鐵燈臺市之而
命磨洗即銀也泰亟往還之中和中將家于義興置一
別墅用緡二百千既半授之矣泰遊吳興郡約迴日當
詣所止居兩月泰迴倚舟墅前復以餘資授之俾其人

他徙於時覩一老嫗長慟數聲泰驚悸召詰之嫗曰老婦嘗迨事舅姑于此子孫不肖為他人所有故悲耳泰憮然久之因紿曰吾適得京書已別除官固不可駐此也所居且命爾子掌之言訖解維而逝不復返矣子展進士及第入梁為省郎

出撫言

李質

唐咸通中吉州牙將李質得疾將死忽夢入冥見主吏曰嘗出七人性命合延十四年吏執簿書以取上命久

之出謂質曰事畢矣遂命使者領送還家至一高山推落乃寤質潛志其事自是疾漸平愈後果十四年而終

出報
應錄

范明府

唐范明府者忘其名頗曉術數選授江南一縣宰自課其命云來年秋祿壽俱盡將出京又訪于日者日者曰子來年七月數盡胡為遠官哉范曰某固知之一女未嫁利薄俸以資遣耳及之任買得一婢子因詰其姓氏

婢子曰姓張父嘗為某堰官兵寇之亂略賣至此范驚
起問其父名乃曩昔之交契也謂其妻曰某女不憂不
嫁悉以女粧奩擇邑客謹善者配之秩滿歸京日者大
駭曰子前何相紹之甚算子祿壽俱盡今乃無恙非甲
子差繆即當有陰德為報耳范曰俱無之日者詰問不
已范以嫁女僕事告之日者曰此即是矣子之福壽未
可量也後歷官數任而終

出報
應錄

程彥賓

偽蜀羅城使程彥賓臨淄人也攻取遂寧躬率百夫直
冒矢石城破獲處女三人蔚有姿容彥賓以別室處之
浹旬間父母持金請贖公還金歸女告以全人父母泣
而謝曰願公早建旄節彥賓笑而答曰吾所願壽終時
無病耳後年踰耳順果無疾而終

出微
戒錄

太平廣記卷一百十七

欽定四庫全書

太平廣記卷一百十八

報應十七

漢武帝

東方朔

毛寶

孔愉

宗叔林

桓邈

劉樞

蔡喜夫

劉沼

劉之亨

嚴泰

程靈洗

韋丹

熊慎

王行思

陳弘泰

漢武帝

昆明池漢武帝鑿之習水戰中有靈沼神池云堯時洪水停船此池池通白鹿原人釣魚於原綸絕而去魚夢於武帝求去其鉤明日帝遊戲於池見大魚銜索曰豈非昨所夢乎取魚去鉤而放之帝後得明珠

出三秦記

東方朔

漢武帝宴於未央方噉黍臠忽聞人語云老臣冒死自

訴不見其形尋覓良久梁上見一老翁長八九寸面目
頽皺鬚髮皓白拄杖僂步篤老之極帝問曰叟姓字何
居在何處何所病苦而來訴朕翁緣柱而下放杖稽首
嘿而不言因仰頭視屋俯指帝脚忽然不見帝駭愕不
知何等乃曰東方朔必識之於是召方朔以告朔曰其
名為藻水木之精夏巢幽林冬潛深河陛下頃日頻興
造宮室斬伐其居故來訴耳仰頭看屋而復俯指陛下
脚者足也願陛下宮室足于此帝感之既而息役幸瓠

子河聞水底有弦歌聲前梁上翁及年少數人絳衣素帶纓佩甚鮮皆長八九寸有一人長尺餘凌波而出衣不需濡或有挾樂器者帝方食為之輟膳命列坐於食案前帝問曰聞水底奏樂為是君耶老翁對曰老臣前昧死歸訴幸蒙陛下天地之施即息斧斤得全其居不勝歡喜故私相慶樂耳帝曰可得奏樂否曰故齋樂來安敢不奏其最長人便弦而歌歌曰天地德兮垂至仁愍幽魄兮停斧斤保窟宅兮庇微身願天子兮壽萬春

歌聲小大無異於人清徹繞越梁棟又二人鳴管撫節
調契聲諧帝歡悅舉觴並勸曰不德不足當雅贖老翁
等並起拜受爵各飲數升不醉獻帝一紫螺殼中有物
狀如牛脂帝問曰朕聞無以識此物曰東方生知之耳
帝曰可更以珍異見貽老翁顧命取洞穴之寶一人受
命下沒淵底倏忽還到得一大珠徑數寸明耀絕世帝
甚愛翫翁等忽然而隱帝問朔紫螺殼中何物朔曰是
蛟龍髓以傳面令人好顏色又女子在孕產之必易會

後宮產難者試之殊有神效帝以脂塗面便悅澤又曰
何以此珠名洞穴珠朔曰河底有一穴深數百丈中有
赤蚌蚌生珠故以名焉帝既深歎此事又服朔之奇識

出幽
明錄

毛寶

晉咸康中豫州刺史毛寶戍邾城有一軍人於武昌市
買得一白龜長四五寸置甕中養之漸大放江中後邾
城遭石氏敗赴江者莫不沈溺所養人被甲入水中覺

如墮一石上須臾視之乃是先放白龜既得至岸迴顧

而去

出幽明錄

孔愉

孔愉嘗至吳興餘不亭見人籠龜於路愉買而放之至水反顧視愉及封此亭侯而鑄印龜首回屈三鑄不正有似昔龜之顧靈德感應如此愉悟乃取而佩焉

出會稽先

賢傳

宗叔林

晉陽守宗叔林得十頭龜付厨曰每日以二頭作膳其
夜夢十丈夫皂衣袴褶叩頭求哀明夜復夢八人求命
方悟乃放之後夢八人來謝

出夢
萬

桓邈

桓邈為汝南郡人齋四烏鴨作禮大兒夢四烏衣人請
命覺忽見鴨將殺遂救之買肉以代還夢四人來謝而

去

出夢
萬

劉樞

宋文帝元嘉三年春彭城劉樞字正一自江陵歸鄂下宿上明洲時夜月微明吟宴次忽二人扣舟高呼正一云我自鄂下來要見正一樞引首望之于岸下見二人各長五尺餘容貌華飾皆白服便出與語乃語樞曰久欲奉謁今會良時樞曰卿自鄂下來有何相謂一人曰聞君儒者也故修謁耳遂與同宴夜闌二人俱醉於飲處便卧樞甚異之及左右皆相目不敢言乃以被覆之及明尚寢欲喚因舉被見二魚各長五六尺眼雖動而

甚困矣不敢殺乃昇致江中是夕樞夢二人衣白衣各執一珠放樞卧前不語而去及曉枕前二珠各徑寸乃是雙白魚也

出三
吳記

蔡喜夫

宋景平中東陽大水永康蔡喜夫避住南壟夜有大鼠浮水而來伏喜夫奴牀角奴慙而不犯每以飯與之水勢既退喜夫得返故居鼠以前脚捧青囊囊有三寸許珠留置奴牀前啾啾狀如欲語也

出異
苑

劉沼

秣陵令中山劉沼梁天監三年為建康監與門生作食
次竈裏得一龜長尺許在灰中了不以燔炙為弊劉為
設齋會放之於婁湖俄遷秣陵令

出續
異記

劉之亨

梁劉之亨仕南郡嘗夢二人姓李詣之亨乞命之亨不
解其意既明有人遺生鯉兩頭之亨曰必夢中所感乃
放之其夕夢二人謝恩云當令君延一算

出渚宮
舊事

嚴泰

陳宣帝時揚州人嚴泰江行逢漁舟問之云有龜五十頭泰用錢五千贖之放行數十步漁舟乃覆其夕有烏衣五十人扣泰門謂其父母曰賢郎附錢五千可領之緡皆濡濕父母雖受錢怪其無由及泰歸問乃說贖龜之異因以其居為寺里人號曰嚴法寺

出獨異志

程靈洗

歙州歙縣黃墩湖其湖有蜃

蛟蜃之蜃也

常為呂湖蜃所鬪

湖之近村有程靈洗者卓越不羈好勇而善射夢蜃化
為道士告之曰吾甚為呂湖蜃所厄明日又來君能助
吾必厚報靈洗遂問何以自別道人曰束白練者吾也
既異之明日與村人少年鼓噪于湖邊須臾波濤湧激
聲若雷霆見二牛相馳其一甚困而腹肚皆白靈洗彎
弓射之正中後蜃俄而水變為血不知所之其傷蜃遂
歸呂湖未到而斃後人名其死處為蜃灘呂湖亦從此
漸漲塞今纔餘尋丈之廣居歲餘靈洗偶出有一道人

詣其母求食食訖曰勞母設食無以報之令貧窶到此
當為求善墓地使母隨行上山以白石識其地曰塋此
可以暴貴矣尋而靈洗還母語之靈洗馳求之了無所
見遂遷葬于其所後侯景作亂率郡鄉萬餘衆保據新
安遂隨陳武帝平賊累有奇功軍中謂之程虎及陳武
受梁禪靈洗以佐命功臣與周文昱侯安都為三傑如
漢之蕭張焉後官止丹陽尹按靈洗宅湖東二里宅南
有楮樹其大數十圍樹有靈令村人數有祈禱其祝辭

號為千年樹其墓在湖西北黃牢山下故檢校刑部郎
中程皓即其後也

出歙州
圖經

韋丹

唐江西觀察使韋丹年近四十舉五經未得嘗乘蹇驢
至洛陽中橋見漁者得一鼃長數尺置于橋上呼呻餘
喘須臾將死羣萃觀者皆欲買而烹之丹獨憫然問其
直幾何漁曰得二千則鬻之是時天正寒韋衫襖袴無
可當者乃以所乘劣衛易之既獲遂放於水中徒行而

去時有胡蘆先生不知何所從來行止迂怪占事如神
後數日韋因問命胡蘆先生倒屣迎門欣然謂韋曰翹
望數日何來晚也韋曰此來求謁先生曰我友人元長
史談君美不容口誠託求識君子便可偕行韋良久思
量知聞間無此官族因曰先生誤但為某決窮達胡蘆
曰我焉知君之福壽非我所知元公即吾師也往當自
詳之相與策杖至通利坊靜曲幽巷見一小門胡蘆先
生即扣之食頃而有應門者開門延入數十步復入一

板門又十餘步乃見大門製度宏麗擬於公侯之家復
有丫鬟數人皆極姝美先出迎客陳設鮮華異香滿室
俄而有一老人鬚眉皓然身長七尺褐裘韋帶從二青
衣而出自稱曰元濬之向韋盡禮先拜韋驚急趨拜曰
某貧賤小生不意丈人過垂採錄韋未喻老人曰老夫
將死之命為君所生恩德如此豈容酬報仁者固不以
此為心然受恩者思欲殺身報効耳韋乃矍然知其龜
也然終不顯言之遂具珍羞流連竟日既暮韋將辭歸

老人即於懷中出一通文字授韋曰知君要問命故輒于天曹錄得一生官祿行止所在聊以為報凡有無皆君之命也所貴先知耳又謂胡蘆先生曰幸借吾五十千文以充韋君改一乘早決西行是所願也韋再拜而去明日胡蘆先生載五十緡至逆旅中賴以救濟其文書具言明年五月及第又某年平判入登科受咸陽尉又明年登朝作某官如是歷官一十七政皆有年月日最後年遷江西觀察使至御史大夫到後三年廳前早

莢樹花開當有遷改北歸矣其後遂無所言韋常寶持之自五經及第後至江西觀察使每授一官日月無所差異洪州使廳前有阜莢樹一株歲月頗久其俗相傳此樹有花地主大憂元和八年韋在位一旦樹忽生花韋遂去官至中路而卒初韋遇元長史也頗怪異之後每過東路即于舊居尋訪不獲問於胡蘆先生先生曰彼神龍也處化無常安可尋也韋曰若然者安有中橋之患胡蘆曰述難困厄凡人之與聖人神龍之與蠕蠕

皆一時不免也又何異焉

出河東記

熊慎

唐豫章民有熊慎者其父以販魚為業嘗載魚宿于江
澚聞船內千百念經佛聲驚而察之乃船中諸魚也遂
歎異而悉取放之不復以漁為業後鬻薪于石頭窮苦
至甚嘗暮宿於江上忽見沙中光焰高尺餘就掘之得
黃金數斤明日齎詣都市貨之市人云此所謂紫磨金
也酬緡數十萬熊氏由此殖產鉅富子孫于今存焉

出報

應錄

王行思

偽蜀渠陽鄰山有富民王行思嘗養一馬甚愛之芻粟
餵飼倍于他馬一日因乘往本郡遇夏潦暴漲舟子先
渡馬迴舟以迎王氏至中流風起船覆其馬自岸奔入
駭浪接其主蒼茫之間遽免沈溺

出儼
誠錄

陳弘泰

偽蜀廣都縣百姓陳弘泰者家富于財嘗有人假貸錢

一萬弘泰徵之甚急人曰請無慮吾先養蝦蟇萬餘頭
貨之足以奉償泰聞之惻然已其債仍別與錢十千令
悉放蝦蟇于江中經月餘泰因夜歸馬驚不進前有物
光明視之乃金蝦蟇也

出做
誠錄

太平廣記卷一百十八

欽定四庫全書

太平廣記卷一百十九

報應十八

杜伯

公孫聖

一作勝

燕臣莊子儀

游敦

王宏

宋皇后

徐光

王淩

夏侯玄

金玄

經曠

萬默

麴儉

太樂伎

鄧琬

孔基

曇摩讖

支法存

張超

袁粲幼子

庾宏奴

魏煇儁

直子融

杜伯

杜伯名曰恒入為周大夫宣王之妾曰女鳩欲通之杜伯不可女鳩訴之宣王曰竊與妾交宣王信之囚杜伯于焦使薛甫與司空錡殺杜伯其友左儒九諫而王不聽杜伯既死為人見王曰恒之罪何哉王召祝而以杜

伯語告祝曰始殺杜伯誰與王謀之王曰司空錡也祝曰何以不殺錡以謝之宣王乃殺錡使祝以謝之伯猶為人而至言其無罪司空錡又為人而至曰臣何罪之有宣王告皇甫曰祝也為我謀而殺人吾殺者又皆為人而見訴奈何皇甫曰殺祝以謝可也宣王乃殺祝以兼謝焉又無益皆為人而至祝亦曰我焉知之奈何以此為罪而殺臣也後三年宣王遊圃田從人滿野日中見杜伯乘白馬素車司空錡為左祝為右朱冠起於道

左執朱弓彤矢射王中心折脊伏于弓衣而死

出還
宛記

公孫聖

吳王夫差殺其臣公孫聖而不以罪後越伐吳王敗走
謂太宰嚭曰吾前殺公孫聖投于胥山之下今道由之
吾上畏蒼天下慙於地吾舉足而不能進心不忍往子
試唱于前若聖猶在當有應聲嚭乃登餘杭之山呼之
曰公孫聖聖即從上應曰在三呼而三應吳王大懼仰
天歎曰蒼天乎寡人豈可復歸乎吳王遂死不返

出還
宛記

燕臣莊子儀

燕臣莊子儀無罪而簡公殺之子儀曰死者無知則已
若其有知不出三年當使君見之明年簡公將祀於祖
澤燕之有祖澤猶宋之有桑林國之大祀也男女觀之
子儀起于道左荷朱杖擊公公死于車上

出報
究記

游敦

游敦字幼齊漢世為羽林中郎將先與司隸校尉胡軫
有隙遂脫但言伏罪游幼齊將鬼來于是遂死

出還
究記

王宏

漢王宏字長文為扶風太守與司徒王允俱為李傕等所害宏素與司隸校尉胡仲不相能仲因就獄竟其事宏臨死歎曰胡仲小子勿樂人之禍禍必及汝仲後病頭不得舉眼若睡見宏來以大杖擊之數日死

出還
宛記

宋皇后

漢靈帝宋皇后無寵而居正位後宮幸姬眾共譖毀初中常侍王甫枉誅渤海王悝及妃妃即后之姑也甫恐

后怒乃與大中大夫程何共誣后執左道呪咀靈帝信之收后璽綬后自致暴室以憂死父及兄弟俱被誅諸常侍大小黃門在省署者皆憐宋氏無罪帝後夢見桓帝曰宋皇后何罪過而聽用邪嬖使絕其命昔渤海王惺既已自貶又受誅斃今宋后及惺皆訴于天上帝震怒罪在難救夢殊明察帝既覺而懼以事問羽林左監許永此為何祥其可禳乎永對以宋氏及渤海無辜之狀並請改葬以安冤魂還宋家之徙復渤海之封以消

災咎帝弗能用尋亦崩焉

出還
宛記

徐光

徐光在吳常行街市里間種梨橘棗栗立得食而市肆
賣者皆已耗矣凡言水旱甚驗常過大將軍孫綝門褰
衣而趨左右唾踐或問其故答曰流血臭腥不可耐綝
聞而殺之斬其首無血及綝廢幼帝更立景帝將拜陵
上車車為之傾因顧見徐光在松柏樹上附手指揮嗤
笑之綝問侍從無見者綝惡之俄而景帝誅綝

出還
宛記

王凌

司馬宣王功業日隆又誅魏大將軍曹爽篡奪之迹稍彰王凌時為揚州刺史以魏帝制於彊臣不堪為主楚王彪年長而有才欲迎立之兗州刺史董華以凌陰謀告宣王宣王自將中軍討凌卒至凌自知勢窮乃單舸出迎宣王遂送凌還京師至項城過賈逵廟側凌呼曰賈梁道吾固盡心於魏之社稷惟爾有神知之凌遂飲藥酒死三族皆誅其年宣帝有病白日見逵來并凌為

崇因呼淩字曰彥雲緩我宣王身亦有打處少時遂卒

出還
宛記

夏侯玄

魏夏侯玄字太初以當時才望為司馬景王所忌而殺之玄宗族為之設祭見玄來靈座脫頭置其旁悉斂果肉食物以納頭既而還自安頸而言曰吾得訴於上帝矣司馬子元無嗣也既而景王薨遂無子文王封次子攸為齊王繼景王後攸薨攸子冏嗣立又被殺及永嘉

之亂有巫見宣王泣云我國傾覆正由曹爽夏侯玄二人訴寃得申故也

出還
寃記

金玄

晉明帝殺力士金玄謂持刀者曰我頭多筋斫之必令即斷吾將報汝刀者不能留意遂斫數瘡然後絕後見玄絳冠朱服赤弓彤矢射持刀者呼云金玄緩我少時而死

出還
寃記

經曠

河間國兵張麤經曠二人相與諧善晉太元十四年五月五日共升鍾嶺坐于山椒麤酒酣失性拔刀斬曠曠託夢于母自說為麤所殺屍在澗間脫裳覆腹尋覓之時必難可得當令裳飛起此處也明晨追捕一如所言麤知事露將謀叛逆出門見曠手執雙刀來擬其面遂不得去母遂報官麤伏辜

出還
究記

萬默

晉山陰縣令石密先經為御史枉奏殺句容令萬默密

尋白日見默來殺密死

出還
宛記

麴儉

前涼張天錫元年西域校尉張頽殺麴儉儉臨死具言
取之後頽偶見白狗以刀斫之不中頽便倒地不起左
右見儉在旁遂暴卒

出還
宛記

太樂伎

宋元嘉中李龍等夜行掠劫于時丹陽陶繼之為秣陵
縣令令人密尋捕遂擒龍等引入是太樂伎劫發之夜

此伎與同伴往就人宿共奏音聲陶不詳審為作款引
隨例申上而所宿主人及賓客並相明證陶知枉濫但
以文書已行不欲自為通塞并諸劫十人於郡門斬之
此伎聲價藝態又殊辨慧將死之日曰我雖賤隸少懷
慕善未嘗為非實不作劫陶令已當具知枉見殺害若
無鬼則已有鬼必自陳訴因彈琵琶歌數曲而就死眾
知其枉莫不隕泣經月餘陶遂夢伎來至案前云昔枉
見殺實所不忿訴天得理今故取君便跳入陶口乃落

腹中陶即驚寤俄而倒狀若風癲良久蘇醒有時而發發即天矯頭乃著背四日而亡亡後家便貧瘁二兒早死餘有一孫窮寒路次

出還宛記

鄧琬

宋泰始元年江州長史鄧琬立刺史晉安王子勲為帝作亂初南郡太守張悅得罪鑠歸揚都及湓口琬赦之以為冠軍將軍共綱紀軍事袁顗既敗張悅懼誅乃稱暴疾伏甲而召鄧琬既至謂之曰卿首唱此禍今事急

矣計將安出琬曰斬晉安王以待王師或可以免悅怒曰卿始此禍而欲賣罪少帝乎命斬於牀前并殺其子以琬頭降至五年悅卧疾見琬為厲遊死

出還琬記

孔基

會稽孔基勤學有志操族人孔敞使其二子從基為師而敞子並兇狠趨向不軌基屢言於敞此兒常有忿志敞尋喪亡服制既除基以宿舊乃齋羊酒往看二子二子猶懷宿怨潛遣奴路側殺基奴還未至乃見基來張

目攘袂厲聲言曰奸醜小豎人面獸心吾蒙顧存昔敦
舊平生有何怨惡候道見害反天忘父人神不容要當
斷汝家種從此之後數日見形孔氏無幾大兒向廁忽
便絕倒絡繹往看已斃于地次者尋復病疽而死卒致

兄弟無後

出還
宛記

曇摩讖

沮渠蒙遜時沙門曇摩讖者博達多識為蒙遜之所信
重魏氏遣李順拜蒙遜為涼王乃求曇摩讖蒙遜恡而

不與曇摩讖意欲入魏屢從蒙遜請行蒙遜怒殺之既而左右當白日中見曇摩讖以劍擊蒙遜因以疾而死

出還
寃記

支法存

支法存者本自胡人生長廣州妙善醫術遂成巨富有八九尺髀髀百種形像光彩曜目又有沈香八尺板牀居常芬馥王譚為廣州刺史大兒劭之屢求二物法存不與王因狀法存豪縱殺而籍沒家財焉死後形見于

府內輒打閣下鼓似若稱冤如此經月王尋得病恒見
法存守之少時遂亡劬之比至揚都又死焉

出還
冤記

張超

高平金鄉張超先與同縣翟願不和願以宋元嘉中為
方輿令忽為人所殺咸疑是超超後除金鄉縣令解職
還家入山伐材翟兄子銅烏執弓持矢并齎酒醴就山
餽之斟酌已畢銅烏曰明府昔害我叔無緣同戴天日
即引弓射之超乃死銅烏其夜見超云我不殺汝叔橫

見殘害今已上訴故來相報引刀刺之吐血而死

出還
宛記

袁粲幼子

齊高祖欲禪宋尚書令袁粲舉兵不從被害其幼子乳母潛將投粲門生狄靈慶靈慶殺之經年忽見兒騎狗戲如常後復有一狗走入靈慶家遇靈慶便噬殺之其

妻子竝死于狗

出古
今記

庾宏奴

庾宏為竟陵王府佐家在江陵宏令奴無患者載米餉

家未達三里遭劫被殺屍流汨查口村時岸傍有文欣者母病醫云須得髑髏屑服之即差欣重賞募索有鄰婦楊氏見無患尸因斷頭與欣欣燒之欲去皮肉經三日夜不焦眼角張轉欣雖異之猶惜不棄因刮耳頰骨與母服之即覺骨停喉中經七日而卒尋而楊氏得疾通身洪腫形如牛馬見無患頭來罵云善惡之報其能免乎楊氏以語兒言終而卒

出幽明錄

魏輝雋

北齊陽翟太守張善苛酷貪叨惡聲流布蘭臺遣御史
魏輝儁就郡治之贓賄狼籍罪當合死善于獄中使人
通訴反誣輝儁為納民財枉見推縛文宣帝大怒以為
法司阿曲必須窮正令尚書令左丞盧斐覆驗之斐遂
希旨成輝儁罪狀奏報于州斬決輝儁遺語令史曰我
之情理是君所見今日之事可復如之當辦紙百番筆
二管墨一錠以隨吾屍若有靈祇必望報盧令史哀悼
為之殯斂并備紙筆十五日善得病唯云叩頭未旬日

而死纔兩月盧斐坐譏駁魏史為魏收奏文宣帝鴆殺


之出還
宛記

真子融

真子融北齊世嘗為井陘關收租使贓貨甚為人所糾
齊主欲以行法意在窮治乃付并州城局參軍崔法瑗
與中書舍人蔡暉共拷其獄然子融罪皆在赦前法瑗
等觀望上意抑為赦後子融臨刑之際怨訴百端既不
得理乃曰若使此等平直是無天道後十五日法瑗無

病死經一年許蔡暉患病膚肉爛墮都盡苦楚日加方

死出還
究記



太平廣記卷一百十九